



Peqqinnisaqarfiup aqunneqarnera, aaqqissuussaana kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaanni nr. 27, 18. november 2010-meersumi § 3, imm. 2 naapertorlugu nalunaarusiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nalunaarutip minnerpaamik imarissavai atorfiup illersugaanera aammalu katsorsartittut pisinnaatitaaffii pillugit aalajangersakkat. Soqutigisaqartut attuumassuteqartut nalunaarutip imarisassaaniq suliaqarnermi akuutinneqassapput.

(Inatsisartunut ilaasortaq Aqqa Samuelsen, Inuit Ataqatigiit)
(Siullermeerneqarnera)

Inatsisartunut ilaasortaq Aqqa Samuelsen Inuit Ataqatigiit qujaffingerusuppara tarnikkut peqqissunik innuttaqarnissarput qanoq pisariaqartiginersoq erseqqissarmagu. Tamannami inuiaqatigiittut siuariartornitsinnut sukartut aqquutissiuussisussatut isigigatsigu.

Ajoraluartumik tarnikkut anniaateqarnek nunatsinni oqaasertalersoruminaatsitatsinnut eqqartoruminaatsitatsinnullu ilaavoq. Allangortinniagassatsinnullu ilaavoq. Tarnip nakorsai kisimik isumallutiginagit, aamma ulluinnarni, atuarfinni, suliffeqarfinni il. il. eqqartueqatigiinnerusariaqarpugut. Tarnikkut anniaateqarnek qanoq isumaqarpa? Ilaqutaasut akornnanni tarnikkut anniaatit qanoq tiguneqarlutillu akiorneqarniassappat? Anniaatinullu taamaattunut qanoq nakorsaasoqartarpa?

Nassuertariaqarpunga qulaani apeqquutigisanni aataasinnguarluunniit akisinnannginnakku – immaqa eqqartorneq ajoratsigu. Immaqa taamaassimassanngikkaluarpoq tarnikkut anniaateqartarneq ammanerusumik eqqartorneqarnerusarsimasuuppat.

Kalaaliusugut timikkut napparsimasoqartillugu inuppalaassusermik misiginneqataanermillu takutitsillaqqittarpugut, kisiannili tarnikkut anniaateqartoqaraangat assinganik eqqarsartarpugut? Akissutissara siulleq naamiuvoq. Sammisag suli paquminartuuvoq. Tamaana alianartuusoraara, tassami inuit taakkua paasineqarnissartik pisariaqartittorjuummassuk.

Tarnip nakorsaanik oqaloqateqarnissamut pisariaqartitsineq arlalinnik peqquteqarsinnaavoq. Aammalu imaangilaq inuit tarnimikkut anniaatillit kisimik tarnip nakorssanik oqaloqateqarnissamut pisariaqartitsisuusut. Aliasunnermi, avinnermi, ilaqutaasullu qimagunnerata kingorna il. il aamma pisariaqartitsisoqarsinnaavoq. Taamaammat taamatut inissisimasut inuunerminni artorsarnerminni ilinniarluarsimasunik, inuunermi ingerlariaqqinnissaanut ikiuisinnaasunik isumannaarinissarput pisariaqarlunnarpoq.



Inuit tarnip nakorsaanik nakorsartinnissamik pisariaqartitsisut pitsaassusermik qaffasinnerpaamik pisariaqartitsimmata siunnersuuteqartoq isumaqtigilluinnarpara. Assigisaanik soorlu napparsimasut peqqissaasunik nakorsanillu sulinissamut akuersissuteqartunik naapitaqartarnerattuut.

Taamatut oqaaseqareerlunga, inuit ikiortariallit eqqartorneqarmata nalunaarut tuaviuussassaassanngimmat, illuatungaanili eqqarsaatigilluarlugulu suliarilluarnissaanut isumaqataavunga. Taamatut oqaaseqarluta Naalackersuisut allannguutissatut siunnersuutaanut tapersiivugut, siunnersuullu Ilaqutariinnermut Peqqissutsimullu Ataatsimiititaliamut suliaassanngortillugu ingertaleqqillugu.